

心法要經



百二十一  
在十

48091



元祿九年丙子二月日重脩

皇國環固 帝階級昌

佛日增輝 懋輪常轉

山城州天安寺法金剛院置

4.4

21

正法華經卷第十

西晉三藏竺法護譯



在

正法華經妙吼菩薩品第二十二

於是世尊能仁如來即從眉頂大人之相演百千光照於東方千八萬百億江河沙諸佛國土靡不周遍過是諸佛土有世界名莊嚴照

其土有佛号離垢紫金宿華王如來至真等

正覺與無央數諸菩薩眾眷屬圍遶宣布道

化能仁如來所演光明遍照彼土又其佛土

有一菩薩名曰妙音從過去佛殖眾德本供

養無數百千兆姪諸佛正覺每見諸佛諮

受經典速成聖慧以得尊幢三昧定法華三

昧施離垢三昧樂宿王三昧無著光三昧慧  
印三昧普曉諸音三昧等集衆德三昧喜信  
淨三昧神足戲樂三昧慧光三昧嚴淨王三  
昧離垢光三昧離垢藏三昧無緣三昧日轉  
三昧取要言之普悉逮得億百千姪江河沙  
數諸三昧定其佛光明普遍周至照妙音菩  
薩妙音菩薩蒙佛聖光自詣佛所白世尊曰  
我欲往詣至忍世界見能仁佛誓首作禮諮  
受經典及欲致敬文殊師利藥王菩薩妙勇  
菩薩宿華王菩薩尊意行菩薩淨王菩薩超  
藥菩薩諮講經義受諸不及今一切聞悉發  
道意其佛告曰往族姓子雖到彼土莫發異

想而念其土懈廢下賤所以者何又族姓子  
彼忍世界其大陸地黑山雜糅衆垢石沙穢  
惡充滿谿間山谷不與凡同其土佛身卑小  
丈六菩薩諸身長七八尺又卿本體高四万  
二千踰旬而我現身八万四千踰旬端正殊  
好色像第一威耀殊妙相好顏色難可比喻

積百千德覩莫不歡又卿往至見彼土人慎  
莫心念起不可想如來菩薩佛土不如所以  
者何佛土本空衆生罪福現有不同妙音菩  
薩復白佛言承佛威神如來聖力道德巍巍  
以自娛樂往詣忍世界如來道慧清淨之業  
輒當如法無所違失不敢起想

於時妙音菩薩心自念言不起于座即如其  
像三昧正受到忍世界至靈鷲山當在如來  
法座中間化作八万四千億衆寶蓮華紫金  
莖白銀葉嚴飾淨好光明巍巍照諸會者輒  
如所念即時辦矣文殊師利問能仁佛唯然  
世尊今化現此八万四千衆寶蓮華紫金莖  
白銀葉清淨嚴好此誰瑞應而現此變佛告  
文殊有菩薩名妙音從紫金離垢宿華王佛  
土而來與八万四千菩薩俱進至此忍界欲  
見吾身誓首諮問欲得聽聞正法華經故先  
現瑞文殊師利復問佛言其人宿本積何功  
德造殊妙行而今致此竒特洪勳在何三昧

本造立行願欲聞之所行三昧神足變化吾  
等聞之當受奉行見諸菩薩顏貌色像爲何  
等類舉動進止何所饒益甚哉世尊唯現瑞  
應使諸菩薩來現於此衆會欲見佛語文殊  
卿當啓白衆寶如來今現瑞應使諸菩薩咸  
來至此各現身相一切衆會皆欲見之文殊  
師利即受佛教輒啓滅度衆寶如來尋現瑞  
應於時妙音菩薩而於本土忽然不現與八  
万四千菩薩俱動諸佛土雨寶蓮華同時發  
作百千億伎樂諸來菩薩各自現形其眼明  
好猶如紺色顏貌充滿如月盛明體紫金光  
無央數億百千功德莊嚴其身威神巍巍智

慧光光奇相衆好文飾光顏身力無極其身  
處在七寶絞絡於虛空中去地四丈九尺與  
諸菩薩眷屬圍遶到忍世界至靈鷲山下寶  
絞絡手執寶瑛其價百千詣能仁佛執首足  
下以持貢上能仁如來復白佛言紫金離垢  
宿華王如來致問無量起居輕利由步康強  
又問世尊說法如常乎衆生一切受者增進  
耶蠲除狐疑順法律不也將無多懷姪怒癡  
行憎嫉鬻餐不能恭敬孝順父母聽受道法  
如法奉行不墮邪見愛惜財寶諸根不定爲  
降諸魔衆官屬乎又諸衆生聽受滅度衆寶  
如來所說法耶今諸菩薩故來詣此本土如



來之所發遣欲得奉見七寶塔寺滅度衆寶  
如來問訊啓受聖體康寧說法如何衆生普  
受行如法不衆寶如來現住久如我等故來  
欲得覩見衆寶如來形像所類願佛現之時  
能仁佛語衆寶如來今妙音菩薩及諸眷屬  
欲見世尊聖體形像衆寶如來尋時讚曰善  
哉善哉族姓子卿能故來見能仁佛稽首諮  
受正法華經及復欲覩文殊師利啓諸不逮  
時蓮華首菩薩問佛妙音菩薩往宿命時積  
何德本乃致斯變無極神聖時能仁佛告蓮  
華首菩薩曰乃往過去久遠世時有佛号雲  
雷音王如來至真等正覺講說經道六度無

極菩薩法藏天上天下靡不蒙安時妙音菩薩聞其所說欣然意解鼓百千音樂娛樂其佛八万四千衆寶妙器貢上至尊如是精進供養如來万二千歲又族姓子妙音菩薩往宿命時從雲雷音王如來之世修無上法種此功德未曾懈廢傳如來者化諸愚冥不識至真悉令信樂欲知今時妙音菩薩今妙音菩薩是也用彼世時布施寶器衆伎樂音又復供養無數諸佛億千佛所植衆德本修治衆行前世值遇億百千姪江河沙等諸佛世尊今蓮華首爲見妙音菩薩所行不可限量變無數形爲諸衆生宣布講化正法華經或

現梵天形色貌而誘立之或現天帝形或尊  
豪形或將軍形化導衆兵或息意天王轉輪  
聖王諸散小王尊者長者諸令長形沙門梵  
志形像色貌說正法華經或現比丘比丘尼  
清信士女形宮人嫫女長者夫人諸貧賤女  
形男女大小而誘立之說正法華經或阿須  
倫形迦留羅真陀羅摩休勒人非人形像色  
貌而誘立之說正法華經或入地獄餓鬼畜  
生及諸八難所在擁護而救濟之上中下士  
前後進退隨其形體男女之像而開化之說  
正法華經或入中宮化皇后形度衆貴人蓮  
華首當知妙音菩薩將護忍界一切衆生又

族姓子妙音菩薩以若干變無數方便誘忍  
佛土演正法華經神足威德未曾損耗而復  
增益也聖慧道智亦復如是又族姓子妙音  
菩薩光明功德智慧巍巍周旋十方隨時開  
化輪轉無際皆使入律上中下願各令得所  
還遊忍界復至他方江河沙佛土現菩薩身  
而爲說法又現聲聞緣覺色像而開化示本  
行所學聞之且然各成所志不違本誓若有  
衆生奉如來律以佛色像隨其道律示現形  
貌顯授大道無上正真欲慕涅槃現已滅度  
因而示儀開化道慧妙音菩薩勢力聖智不  
可測度超絕巍巍功德若斯無以爲喻

於是蓮華首菩薩前白佛言妙音菩薩積功  
累德堂堂乃尔唯然世尊住何三昧開化衆  
生不可限量能仁如來告蓮華首菩薩曰族  
姓子聽有三昧名現入衆像妙音菩薩住斯  
定意利益開化無限衆生使入道義佛說是  
妙音菩薩章句品時其諸菩薩與妙音開士  
俱發來者尋時皆逮現入衆像三昧正定其  
行殊勝於是忍界超越菩薩所修定意諸有  
限數若有逮致現入衆像三昧便得揔持攬  
持三世無不蒙濟時妙音菩薩供養能仁如  
來至真具足奉事衆寶如來塔寺舍利欲還  
本止前稽首禮能仁如來自歸而退與衆會

別動震諸國兩衆蓮華同時和鼓百千億姪  
雅頌伎樂與八万四千諸菩薩衆俱歸本土  
前稽首禮妙紫金離垢宿華王如來以詣忍  
界導利衆生又覩衆寶如來寶寺舍利及文  
殊師利藥王菩薩所逮精進無極道力見妙  
勇菩薩令是八万四千菩薩皆得正行現入  
衆像三昧往到彼間俱共進行四万二千人  
子聞正法華經皆悉逮得無所從生法忍蓮  
華首菩薩逮正法華定

正法華經光世音普門品第二十四

於是無盡意菩薩即從座起偏露右臂長跪  
叉手前白佛言唯然世尊所以名之光世音

乎義何所趣耶佛告無盡意曰此族姓子若有衆生遭億百千姪困厄患難苦毒無量適聞光世音菩薩名者輒得解脫無有衆惱故名光世音若有持名執在心懷設遇大火然其山野燒百草木叢林屋宅身墮火中得聞光世音名火即尋滅若入大水江河使流心中恐怖稱光世音菩薩一心自歸則威神護令不見溺使出安隱若入大海百千億姪衆生豪賤處海深淵無底之元採致金銀雜珠明月如意寶珠水精瑠璃車渠馬瑙珊瑚琥珀載滿船寶假使風吹其船流墮黑山迴波若經鬼界值摩竭魚衆中一人竊獨心念光

世音菩薩功德威神而稱名号皆得解脫一  
切衆患及其伴侶衆得濟渡不遇諸魔邪鬼  
之厄故名光世音也佛言族姓子若見怨賊  
欲來危害即稱光世音菩薩名号而自歸命  
賊所持刀仗尋段段壞手不得舉自然慈心  
設族姓子此三千大千世界滿中諸鬼神衆  
邪逆魅欲來燒人一心稱呼光世音菩薩名  
自然爲伏不能妄犯惡心不生不得邪觀若  
人犯罪若無有罪若爲惡人縣官所錄縛束  
其身相械在體若枷鎖之閉在牢獄拷治苦  
毒一心自歸稱光世音菩薩名号疾得解脫  
開獄門出無能拘制也故名曰光世音佛言



如是族姓子光世音菩薩境界威神功德難  
可限量光光若斯故号光世音佛告無盡意  
假使族姓子此三千大千世界滿中衆逆盜  
賊怨害執持兵仗刀刃矛戟欲殺万民一部  
賈客獨自經過在於其路齋持重寶導師恐  
怖心自念言此間多賊將無危我劫奪財寶  
當設權計脫此衆難不見危害謂衆賈人不  
宜恐畏等共一心俱同發聲稱光世音菩薩  
威德輒來擁護令無恐懼普心自歸便脫衆  
難不遇賊害衆賈人聞悉共受教咸俱同聲  
稱光世音身命自歸願脫此畏適稱其名賊  
便退却不敢觸犯衆賈解脫永無恐懼光世

音菩薩威德境界巍巍如是故曰光世音佛  
復告無盡意菩薩若有學人婬怒癡盛瞋首  
歸命光世音菩薩婬癡怒休觀於無常苦空  
非身一心得定若有女人無有子姓求男求  
女歸命光世音輒得男女一心精進自歸命  
者世世端正顏貌無比見莫不歡喜所生子  
姓而有威相衆人所愛願樂欲見植衆德本  
不爲罪業其光世音威神功德智慧境界巍  
巍如是其間名者所至到處終不虛妄不遇  
邪害致得無上道德果實常遇諸佛真人菩  
薩高德正士不與逆人無反復會若聞其名  
執持懷抱功德無量不可稱載若有供養六

十二億恒河沙數諸菩薩等是諸菩薩皆使  
現在等行慈心若族姓子族姓女盡其形壽  
供養衣被飲食牀卧具病瘦醫藥一切所安  
福寧多不無盡意曰多矣世尊不可限量所  
以者何是諸菩薩無央數億不可譬喻佛言  
雖供養此無限菩薩不如一歸命光世音菩  
薩稽首作禮執持名号福過於彼況復供養  
雖復供養六十二億恒河沙數諸菩薩等執  
持名号計此二福億百千劫不可盡極終不  
相比是故名曰光世音

於是無盡意菩薩前白佛言光世音菩薩以  
何因緣遊忍世界云何說法何謂志願所行

至法善權方便境界云何佛言族姓子光  
世音菩薩所遊世界或現佛身而班宣法  
或現菩薩形像色貌說經開化或現緣覺  
或現聲聞或梵天像或天帝像而說經道或  
捷沓和像欲度鬼神現鬼神像欲度豪尊現  
豪尊像或復示現大神妙天像或轉輪聖王  
化四域像或殊特像或復反足羅刹形像或  
將軍像或現沙門梵志之像或金剛神隱士  
獨處仙人僮儒像光世音菩薩遊諸佛土而  
普示現若干種形在所變化開度一切是故  
族姓子一切衆生咸當供養光世音其族姓  
子所可周旋有恐懼者令無所畏已致無畏

使普安隱各自欣慶故遊忍界

於是無盡意菩薩即解已身百千寶瓔以用  
貢上於光世音唯願正士受此法供已身所  
有殊異寶瓔而不肯受時無盡意復謂光世  
音唯見愍念以時納受願勿拒逆時光世音  
心自計念不用是寶無盡意言唯復垂愍諸  
天龍神捷沓和阿湏輪迦留羅真陀羅摩睺  
勒人及非人受其寶瓔輒作兩分一分奉上  
能仁如來一分供養衆寶如來至真等正覺  
貢上寶寺其族姓子普爲一切以是之故神  
足變化遊忍世界無所不濟

於是持地菩薩即從座起前白佛言假使有

人間光世音所行德本終不虛妄世世安隱  
至無極慧其光世音神足變化普至道門所  
顯威神而無窮極佛說是普門道品彼時會  
中八万四千人至無等倫尋發無上正真道意  
正法華經揔持品第二十五

於是藥王菩薩即從座起長跪叉手前白佛  
言若族姓子及族姓女聞是正法華經典受  
持懷抱書寫經卷獲福如何佛言族姓子女  
受持是經誦在懷抱書寫經卷福不可量無  
以爲喻若族姓子供養八十億百千娑恒河  
沙諸如來衆若復受持懷抱書寫是正法華  
經講說供養何所福多於意云何寧當一心

奉持經典若以衣食供養諸佛藥王菩薩白  
佛言若族姓子及族姓女受正法華經典之  
要執持書寫一四句頌講說諷誦若復奉行  
具足成就其福最多勝於供養若干恒河沙  
諸佛世尊佛言甚哉法之供養最為第一藥  
王菩薩復白佛言我當擁護如是等輩諸族  
姓子及族姓女受此經者斯法師等以義宿  
衛長使無患誦揔持句又尋祝曰  
竒異所思意念無意永久所行奉修寂然澹  
泊志默解脫濟度平等無邪安和普平滅盡  
無盡莫勝玄默澹然揔持觀察光耀有所依  
倚恃怙於內究竟清淨無有坑坎亦無高下

無有廻旋所周旋處其目清淨等無所等覺  
已越度而察於法令衆無音所說鮮明而懷  
止足盡除節限宣暢音響曉了衆聲而了文  
字無有窮盡永無力勢無所思念

藥王菩薩曰唯然世尊是揔持句六十二恒  
河沙諸佛所說假使有犯此祝言者若復違  
毀此等法師為失諸佛世尊道教佛歎藥王  
菩薩大士善哉善哉若族姓子說揔持句為  
衆生故愍念擁護多所安隱

於時妙勇菩薩前白佛言唯然世尊我身亦  
為衆生之故欲令永安若有奉持此經典者  
授揔持句將護如此諸法師等令無伺求得



其便者鬼神諸魍溷廁衆鬼寗鬼獸鬼餓鬼  
反足雖欲來燒無能得便妙勇菩薩專心思  
惟說此揔持曰晃耀大明炎光演暉順來  
富章悅喜欣然住此立制永住無合無集  
是揔持句恒河沙等諸佛所說咸共勸助  
若違如來如是比像諸法師教還自危已

時毗沙門天王前白佛言我亦當演此揔  
持句加以慈心爲衆生故擁護法師富有  
調戲無戲無量無富何富以是擁護諸法  
師等百由旬內無敢犯觸宿衛將順諸族  
姓子如是比像至學法師乃能受持以是擁  
護常獲吉利時順怨天王在彼會坐與諸

香音億百千。姦鬼眷屬圍遶。往詣佛所。前  
白佛言。唯然。世尊。我亦當宣此物。惣持句無  
數。有數曜黑持香。歿祝大體于器。順述暴  
言。至有唯然。世尊。此惣持句四千二百億  
諸佛所說。以此惣持擁護供養諸學經者。  
今無伺求得其便者。

時有一魍名有結縛。復名離結。復名施積。  
復名施華。復名施黑。復名被髮。復名無著。  
復名持華。復名何所。復名取一切精。往詣  
佛所。鬼子母與諸子俱異口同音。前白佛言。  
我等世尊。常當擁護。如是比像諸法師等。加  
施吉祥。今無伺求得法。師短于時。諸魅同共。

舉聲宣此摠持將順法師於是於斯手亦於  
氏極甚無我無吾無身無所俱同已興已生  
已成而住而立亦住嗟歎亦非消頭大疾無  
得加害

是等之類是我眷屬今無所犯擁護法師消  
除鬼神諸魍魅餓鬼溷鬼突鬼盪道符祝癡狂  
顛鬼化是像來若鬼神形及非人像二日三  
日若至四日若常熱病若復夜卧值惡夢者  
若現男女大小諸像我等擁護今無伺求得  
其便者於時諸魅共於佛前說此頌曰  
犯頭破七分 猶如華菜剖 當致殺母罪  
亦得害父殃 其有犯法師 皆當獲此豐

世世得不安

不與諸佛會

破壞佛寺罪

闔亂聖眾殃

如合眾麻油

麻油聚一處

放火皆燦然

消盡無有餘

其有犯法師

當獲此罪殃

猶如稱戴峻

罪垢之所聚

其有犯法師

當獲此重疊

諸鬼神軍頭等說此偈已前白佛言我等咸

護如是比像諸法師等使常安隱除去怨敵

周帀宿衛今無傷害若有行毒毒為不行時

佛嗟歎諸魅所祝善哉善哉汝等乃欲護諸

法師若聞此經宣持名号德不可量何況具

足隨時持說書在經卷若以供養華香幢蓋

雜香擣香然燈懸繒思夷合歡青蓮紅蓮黃

蓮白蓮消著油蘇以用然燈供養此經勤修  
不懈百千億倍福不可限汝等當護如是比  
像精進學者佛說是摠持品時六万八千人  
逮得無所從生法忍

正法華經住世淨復淨王品第二十六

佛告族姓子乃往過去無央數劫不可思議  
長遠難量今時有佛号摠水雷音宿華慧王  
如來至真等正覺明行成爲善逝世間解無  
上士道法御天人師爲佛世尊世界曰照明  
嚴飾劫曰愛見又族姓子於其佛世有王名  
淨復淨今時其王有一正后名曰離垢施其  
后有二子一名離垢藏二名離垢曰又其二

子皆得神足輕舉能飛智慧具足功德備悉  
聖達巍巍行菩薩業夙夜精進未曾懈廢勤  
心專精六度無極善權四等所濟無限悉遵  
通達三十有七道品之法普暢道義所旋周  
業進逮離垢三昧定矣度宿日炆三昧離垢  
光三昧離垢顯耀三昧淨莊嚴三昧大威藏  
三昧皆得通達此三昧定而度無極時佛集  
會與諸四輩釋梵四天王諸天人人民班宣分  
別正法華經時佛愍念一切衆生哀傷國王  
皆欲化之使入大道又族姓子其二太子往  
詣母所叉手白言唯願屈意見念加慈專精身  
心欲往到佛所奉見如來身亦自欲稽首歸

命所以者何今日如來爲天上天下一切衆  
生廣宣要典正法華經故當奉覲聽正法華  
離垢施后告二太子汝等父王志存外邪信  
樂梵志常懷瞋恨以是之故不可得往時二  
太子同心叉手自復白其母我等薄相所生  
邪見無義之家又我等身本是法王子當以  
經道化于濁俗反僞向真尔乃佛子於是離  
垢施后告二太子善哉行矣汝真孝子爲其  
父母修大慈愍各顯神足覩之欣然心中開  
解便聽子等俱詣佛所稽首受業時二太子  
輒受母教其身踊住在虛空中去地七仞愍  
念其親各現威變在於虛空二人俱時坐卧

經行身上出火身下出水身上出水身下出  
火演大光明照耀遠近現身長大復還為小  
從虛空下入于地中若人入水從地踊出處  
在虛空猶如履地其二太子現若干變而顯  
神足以用開化於其父母于時父王覩其二  
子神足變化威德若斯欣然踊躍善心生焉  
躬身叉手向二子曰汝等師主所受誰乎時  
二太子自啓父王大王欲知我等師主惣水  
雷音宿華慧王如來至真是我等師主今者  
現在遊於寶樹下處于法座為四部衆諸天  
人民廣演宣布正法華經其佛世尊是我等  
師主也王告二子吾欲往詣卿等師主奉覲



親受大聖正真無上言教時二子從虛空下  
行至母所自白其母而又手言阿母威德則  
化父王以造立心無上正真因成道教聖尊  
之業唯垂愍念聽我詣佛出家為道得作沙  
門時二太子為母說偈

唯母聽我等

出家為沙門

如來甚難遇

曼時當精學

所云難得值

猶如靈瑞華

難遇復超彼

閑靜不可得

於時王后離垢施而頌告曰

吾以聽汝等

善哉子輒去

至聖甚難值

我亦出家俱

余時二太子歎是法頌報父母已重復白父

王及所生母唯願二親同時一心俱往詣惣  
水雷音宿華慧王佛所屈意時發見彼世尊  
稽首歸命所以者何二親當知佛興難值猶  
靈瑞華亦如如意最上明珠佛亦復然不可  
再遇是故我等來生此土心念出家功德第  
一由是之故不宜有難便可相許報言善哉  
得出家學棄捐愛欲捨其俗業所以者何若  
覩如來福慶無量人命難得佛出世難值離於  
八難得閑靜難猶死更生父王皇后報子言  
諾宜知是時佛言族姓子尔時淨復淨王宮  
內八万四千宮人媠女宿命本德應得啓受  
是正法華經典本是道器離垢目太子宿命

本修行積功累德從來無限離垢截太子無  
央數億百千姪劫往眷宿命曾以奉行棄於  
衆生一切惡趣三昧正定何謂棄於衆生一  
切惡趣三昧正定其王正后二太子母離垢  
施者曉十方佛一切道同諸佛要集諸佛奧  
藏無極聖慧以權方便現于女身也佛告族

姓子時王淨復淨見二太子所現神足化入  
如來至真之法以得超越展轉相教展轉相  
成多所度脫一切盲冥咸入道明便自發意  
與其眷屬四万二千離垢施后與諸群黨隨  
二太子中宮嫒女群臣百官一時和同往詣  
佛所稽首足下退各就坐從本常位時佛見

淨復淨王與大眷屬自投歸命因其本行觀  
宿所緣而爲說法應病與藥各得開解欣然  
踊躍善心生焉更立國王蒞駕印綬與其正  
后離垢施及二太子宫人嫫女一切官屬棄  
國捐王行作沙門已作沙門八万四千歲奉  
修道業思惟觀察是正法華經典之要諷誦  
奉行如佛所教無所違失於是淨復淨王  
遵奉勤修正法華經與其眷屬竟八万四  
千歲逮衆德本嚴淨三昧正定適逮斯定  
其身即時踊在虛空去地四丈九尺住於  
虛空遙白搃水雷音宿華慧王如來至真  
唯然出尊其二子者則是聖師化導吾家

蒙其恩德獲現神足顯揚變化而緣是現  
所化神變心得開解退俗入道承佛法訓度  
衆穢厄順從法律堅住無極得奉如來啓受  
經法乃爲至聖無蓋善師是二子者示現子  
像生我家耳皆是宿世明識本德承佛仁慈  
非是凡庶之可思論佛告王曰如是如是大  
王如大王所言是二太子宿植德故乃能示  
現因欲開王及諸眷屬一切衆生佛言大王  
若族姓子及族姓女學是經典所生之處周  
旋終始易得善師顯世尊教得立無上正真  
之道開化道示度脫一切是爲微妙無極之  
業展轉相教展轉相成得至聖諦無極之處值

佛道法王用遇善師得見如來啓受經法由  
勸助恩王今寧見此二太子是諸族姓子前  
世已曾供養奉事六十五億百千北姪恒河  
沙等如來至真而復受持是正法華經愍傷  
衆生沒在邪冥九十六種不能自濟故開化  
之令住正見修行精進求佛大道

於是佛語族姓子曰其淨復淨王於彼世時  
歎衆功德從虛空下即叉十指前白其佛唯  
佛宣布如來至真本宿命時行何功德聖慧  
巍巍眉間之相演大輝耀照無限國而目明  
好徹覩十方其眉間相白如珂雪柔輭細好  
巍巍光澤平正無邪無所不照世尊面像充

滿如日安住道目猶如月初一切觀之而無  
獸極於時國王說此頌曰 其殊異功勳

巨億百千孩 虛空尚可喻 其慧不可限

佛以頌荅曰

前世行中正 加施人平等 故使眉間相

所照無有限 和視施燈慧 目明喻日月

其眼如月初 徹覩十方國

時王嗟歎已叉手白佛至未曾有如來至真

之教弘慈無極不可思議功德具足敷演道

義施設法禁令無罪豐長塗塗之難皆得無患

唯然世尊如吾今日心不放逸由得自在不

墮邪逕棄捐自大不從虛偽亦無瞋恨不興

惡心無益之業我國多事欲出家學不還中  
宮重欲自歸所有供養佛言大佳時王即起  
稽首佛足其王正后離垢施者解身百千所  
著寶瓔以散佛上佛之威神化成七寶交露  
之帳化爲交露琦異妙帳自然有牀布以無  
數琦異坐具如來坐上於時國王心自念言

至未曾有天尊至得交露帳中所見如來甚  
大端正威神巍巍光色第一顏貌充滿淨好  
無比願令一切皆蒙此度於時世尊告四部  
衆汝等寧見淨復淨王一心叉手而住佛前  
皆曰以見佛言比丘是王於今是我學世現  
比丘像於將來世當得作佛名曰種帝王如



來至直等正覺明行成爲善逝世間解無上  
士道法御天人師爲佛世尊其佛土曰廣普  
劫曰超王於時其佛諸菩薩衆不可稱限諸  
聲聞衆亦無央數其佛世界平等如掌無有  
傾邪無砂礫石得作佛時威神巍巍廣大無  
極光光如是能仁如來告族姓子欲知爾時  
淨復淨王發道意者豈是異人莫造此觀所  
以者何則是今現蓮華首菩薩是欲知爾時  
離垢王后者今光照嚴飾菩薩是常念諸菩  
薩愍傷衆生故生彼國開化度之欲知爾時  
二太子者則今藥王菩薩超藥菩薩身是又  
族姓子藥王菩薩超藥菩薩功德巍巍無限

若斯在無央數億百千姪諸如來所植衆德  
本是二正士道德備悉不可思議若有聞此  
二正士名執持懷抱一切衆人皆當禮敬如  
是學士天上世間皆歸仰之佛說是往古宿世  
本所行時八万四千人遠塵離垢諸法法眼淨  
正法華經樂普賢品第二十七

於時普賢菩薩過東方恒河沙諸佛國土諸  
菩薩來者動諸佛國雨衆蓮華鼓億百千姪  
伎樂歌歎如來功勳承其開士其大神足無  
極變化大菩薩身威神巍巍聖旨玄妙普照  
十方與諸天龍捷陀羅阿須倫迦留羅直陀  
羅摩休勒人及非人俱各各將諸眷屬各顯

神足不可思議至靈就鷲山往詣佛所稽首足  
下繞佛七匝前白佛言我從寶超威王如來  
佛土來承今世尊演正法華經故至忍界欲  
得聽受與諸菩薩無數百千亦樂聽聞所宣  
道議善哉世尊唯加垂哀以時班宣正法華  
經寧有女人何所修行得奉執經卷時佛即  
告普賢菩薩族姓子女人有四事法得是經  
卷何謂為四一曰常為諸佛所見建議二曰  
積功累德不以懈廢三曰能分別化究暢衆  
要諸所聚處四曰普護衆生發未發者是為  
四逮是經卷

時普賢菩薩前白佛言最後末俗五濁之世

若有比丘受是經典長擁護之令得吉祥除  
衆枉橫毒亦不行令無伺求得其便者有受  
是經咸共宿衛令魔波旬不能燒亂及諸官  
屬諸鬼神龍溝邊溷鬼盪道符祝令不得行  
躬身自往常以一心擁護法師當使安隱若  
有比丘學此經典坐起經行精進修業上馬  
車乘往到其所護此經典與諸菩薩眷屬園  
遶俱當往詣法師比丘受是經者思惟行者  
令不亡失正法華經一句之義乘駕往詣此  
學士所曰自奉見為是經故見我歡喜普更  
勤學當護法師逮得三昧若復獲致迴轉揔  
持又當逮成若干百千億周旋揔持曉了一

初諸音摠持唯願世尊若於最後餘殘末俗  
五濁之世餘五十歲中比丘比丘清信士  
清信女受是經典宣示同學持書慕求為他  
人說最後末俗餘五十歲若能受是正法華  
經心存解義精進不廢致二十一日諸行稍  
備已致諸行二十一日勤心存於法自現可

敬巍巍之德乘六通馳與諸眷屬大小相隨  
往詣法師勸助法師二十一日專修此法使  
心開解懷致摠持若使法師不化衆生若不  
勸助不能開化非人得便猶是法師不得擁  
護不致安隱是故學者常行精進承佛威神  
宿衛法師若有法師持佛正法便勤精進願

聽揔持其辭祝曰

無我除我回我方便賓仁和除其柔輒柔瀨  
句見諸佛因諸揔持行眾諸說蓋回轉盡集會  
除眾趣無央數計諸句三卅數等越有為學  
諸法曉眾生音師子娛樂

唯然世尊是則名曰是揔持句若有菩薩耳  
根聽聞此揔持句入耳中者即當知之普賢  
菩薩之所建立是正法華經若布施天下閻  
浮利內值是經者心當思念普賢菩薩威  
神所致令我等輩致是經卷普賢菩薩所行  
神化令此眾人致此妙典斯等眾生無數佛  
所積眾德本如來至真手摩其頭若有書寫

執持在手則奉佛身敬愛道法敬書是經書  
是經已欲解中義於此壽終生忉利天適生  
天上八万四千天人玉女往就供養鼓琴歌  
頌已作天子坐玉女中而相娛樂若族姓子  
但書是經功德如是何況誦說思惟中義是  
故世尊一心勤修正法華經書持經卷常當  
思惟一切不忘當禮此人用書是經至德所  
致而為千佛所見授臂臨壽終時面見千佛  
遊在吉安不墮惡趣壽終之後生兜術天適  
生天上八万四千諸玉女衆往詣其所鼓諸  
伎樂而歌頌德在諸玉女以法相樂是族姓  
子書是經者功德如斯何況誦說思惟其義

是故勤修書寫宣傳正法華經思惟奉行皆  
今具足專精一心志未曾亂千佛授臂臨壽  
終時面見千佛不墮惡趣於是壽終生兜術  
天在彌勒佛所成菩薩身三十二相莊嚴其  
體億千玉女眷屬圍遶是故智者常當勤修  
書是經典敷演思惟唯然世尊若有書此經  
卷思惟誦說功祚無量不可稱限巍巍如是是  
故智者書持是經當得逮致若干功德吾以  
是故建立是經用吾弘意勤念道法流布天  
下閻浮利內於是能仁如來至真告普賢曰  
善哉善哉汝乃發心多所哀念精進勤護將  
來菩薩勸導於斯無思義法其心懷抱無極



大哀發心之頃攝無量行各執經卷建立擁護若有受持普賢菩薩宣其名者則當知之見能仁佛前已曾聞如是像法供養奉事見能仁佛班宣經道讚之善哉如來摩頭則當謂之是普賢也佛之威神之所建立佛以衣服而覆護之受如來教不樂俗業不喜調戲合偶嘲謔不好歌儻不遊在外不入屠殺養猪雞鷲不與女人無益從事若聞是經書寫聽受持諷誦說樂如是像自然之法思惟奉行緣內精專自興福力一切衆生若有覩見靡不愛敬若有比丘受持此經不爲姪怒癡所縛不爲貪嫉自大所繫不懷憍慢剛強

自用強梁邪見已利止足若有法師普修至  
賢最後末世餘五十歲五濁之俗若有比丘  
受持是經當作是智思惟解念是等族姓必  
至道場降伏魔官而轉法輪擊於法鼓吹  
大法螺演時法雨於師子座而處法坐最後  
末世受持是經功德如是又是比丘不徇利  
養不貪衣鉢是等法師志性質直而無諂諂  
不惰癡冥其人現在自然如是若有比丘受  
持是經世世不忘所生聰明黠慧未曾瞶盲  
現在獲安無有衆患若毀此經訶學持者而  
復誹謗其人現在身致癩病見書是經非之  
不可而共調戲所生之處其身缺陋爲火所

燒常遇諍訟鼻面生炮手足了戾口目不正其  
身臭穢體生瘡痍醫藥不治困苦難言若說  
是經有聞見者宣之不可憎惡不喜所說不  
誠言不真實用是犯惡衆罪之故得殃無量  
在所不安佛言是故普賢若見比丘受持是  
經遙起遠迎恭敬承事如奉如來今佛現在  
靡不歸命歸彼法師如是無異乃應佛教佛  
說是樂普賢品時如恒河沙億百千姪諸菩薩  
衆皆逮揔持

正法華經囑累品第二十八

於是世尊能仁從法座起令諸菩薩如其色  
像示現神足都舉大會著其右掌而讚歎曰

諸族姓子佛從無數不可計會億百千劫積  
累造行乃成無上正真之道得度無極故取  
諸賢安錯右掌舉手下之以爲念識當受斯  
經持諷誦讀當爲衆會分別說之令諸群生  
普得見聞又族姓子心無所著勿得秘惜此  
正法華經志無所畏則施佛慧如來之慧自  
在之慧則爲無上無極法施當學佛行無得  
矜惜慳嫉愛重宜廣示現斯如來慧當使遍  
聞至所不至往所不往當勤聽受此要經典  
其不信者當令信樂當勸群生入于尊法諸  
族姓子能如是者則知如來之所建立時諸  
菩薩爲能仁世尊所見咨嗟悉踊躍加敬頌

身側體佞頭叉手稽首歸命向能仁佛同聲  
啓白唯如世尊所勅不敢違教請奉行之具  
足順從如佛所宣願勿爲慮諸菩薩三啓如  
是所至到處周旋十方班宣聖旨今時能仁  
正覺一切發遣十方世界諸來世尊各隨宜  
便從其所安時十方佛皆亦報曰如來亦當  
從宜所安諸如來正覺多寶世尊七寶講堂  
佛之塔廟即復故處又諸如來皆從所安佛  
說是經時十方無量異佛世界諸來大聖坐  
佛樹下處師子座多寶如來及大士等諸餘  
學行現佛前者不可計會無數無量并從地  
中踊出菩薩諸大聲聞四部之衆諸天龍神



